

- (2) Izdata rješenja upisuju se u knjigu izdatih rješenja na obrascu N/E 2 koja se vodi u Ministarstvu u elektronskom obliku.

Član 13.

(Troškovi postupka priznanja)

Vlada Kantona Sarajevo na prijedlog ministrice za obrazovanje, nauku i mlade Kantona Sarajevo će donijeti odluku o troškovima nostrifikacije/ekvivalencije javnih isprava.

Član 14.

(Stupanje na snagu)

Ovaj pravilnik stupa na snagu danom objavljivanja u "Službenim novinama Kantona Sarajevo".

Broj 11-02/04-38-34776/19

3. aprila 2019. godine

Sarajevo

Ministrica

Mr. Zineta Bogunić, s. r.

Ministarstvo privrede

Na osnovu člana 66. st. (1) i (2) Zakona o organizaciji organa uprave u Federaciji Bosne i Hercegovine ("Službene novine Federacije BiH", broj 35/05) i člana 51. stav (5) Zakona o javnim skijalištima ("Službene novine Kantona Sarajevo", broj 54/12), ministar privrede Kantona Sarajevo donosi

PRAVILNIK

O NAČINU I PROGRAMU POLAGANJA ISPITA ZA REDARA, STICANJE OVLAŠTENJA ZA OBAVLJANJE POSLOVA REDARA NA SKIJALIŠTU I IZGLEDU I NAČINU IZDAVANJA LEGITIMACIJE REDARA

I - OPŠTE ODREDBE

Član 1.

(Predmet Pravilnika)

Ovim pravilnikom propisuje se način i program polaganja ispita za redara, način i postupak sticanja ovlaštenja za obavljanje poslova redara na skijalištu (u daljem tekstu: redar) i izgled i način izdavanja legitimacije redara (u daljem tekstu: legitimacija).

II - NAČIN I PROGRAM POLAGANJA ISPITA ZA REDARA

Član 2.

(Sastav Komisije)

- (1) Ispit za redara polaže se pred Komisijom za polaganje stručnog ispita za redara (u daljem tekstu: Komisija), koju obrazuje ministar privrede Kantona Sarajevo (u daljem tekstu: ministar).
- (2) Komisija ima predsjednika, dva člana i sekretara.
- (3) Olimpijski komitet, Skijaški savez i Ministarstvo privrede Kantona Sarajevo (u daljem tekstu: Ministarstvo) predlažu po jednog člana, koji između sebe biraju predsjednika.
- (4) Administrativno-tehničke poslove za Komisiju obavlja sekretar, a imenuje ga Ministarstvo.
- (5) Predsjedniku i članovima Komisije pripada naknada za rad Komisije u skladu sa odredbama Odluke o načinu obrazovanja i visini naknade za rad radnih tijela koje obrazuje Vlada Kantona Sarajevo i rukovodioci organa kantonalnih organa državne službe ("Službene novine Kantona Sarajevo", broj 21/09 - Prečišćeni tekst, 19/12, 26/14 i 44/14).
- (6) Visina troškova za polaganje ispita za redara na skijalištu utvrdit će se posebnom odlukom.

Član 3.

(Uslovi za člana Komisije)

- (1) Članovi Komisije moraju da imaju stečeno visoko obrazovanje u trajanju od najmanje četiri godine.
- (2) Članovi Komisije koje predlažu Olimpijski komitet i Skijaški savez moraju da imaju licencu izdatu od strane sportske

organizacije koja vrši stručno osposobljavanje u oblasti skijaškog sporta, upisan u Registar sportskih organizacija koji vodi Ministarstvo kulture i sporta Kantona Sarajevo (u daljem tekstu: Registar).

Član 4.

(Raspisivanje oglasa)

- (1) Ministarstvo raspisuje oglas na koji se mogu prijaviti zainteresovana lica za polaganje ispita za redara.
- (2) Oglas iz stava (1) ovog člana naročito sadrži: predmet oglasa, rokove za podnošenje prijave, sadržinu prijave, dokaze koji se podnose uz prijavu, iznos troškova polaganja ispita, broj računa na koji se uplaćuje iznos troškova polaganja ispita i druge podatke od značaja za polaganje ispita za redara.

Član 5.

(Troškovi polaganja ispita)

- (1) Troškove polaganja ispita snosi lice koje polaže ispit za redara na skijalištu (u daljem tekstu: kandidat).
- (2) Troškovi iz stava (1) ovog člana plaćaju se posebno za polaganje predmeta "Poznavanje ovlaštenja i dužnosti redara na skijalištu" i posebno za polaganje predmeta "Poznavanje skijanja", na način uređen ovim pravilnikom.

Član 6.

(Sadržaj prijave)

Pismena prijava za polaganje stručnog ispita za redara na skijalištu sadrži:

- a) ime, očevo ime i prezime kandidata;
- b) datum i mjesto rođenja kandidata;
- c) jedinstven matični broj građana;
- d) vrstu školske spreme i smjer koji je kandidat završio;
- e) fotokopiju dokumenta sa fotografijom kojim se dokazuje lični identitet;
- f) uvjerenje o zdravstvenoj sposobnosti za obavljanje poslova za redara na skijalištu (posebna zdravstvena sposobnost);
- g) dokaz o plaćenim troškovima za polaganje ispita za redara na skijalištu.

Član 7.

(Program polaganja ispita)

- (1) Ispit za redara polaže se po programu koji obuhvata slijedeće predmete:
 - a) "Poznavanje ovlaštenja i dužnosti redara na skijalištu";
 - b) "Poznavanje skijanja".
- (2) Kandidat koji ima licencu izdatu od strane sportske organizacije koja vrši stručno osposobljavanje u oblasti skijaškog sporta i koja je upisana u Registar, ne mora da polaže predmet "Poznavanje skijanja".

Član 8.

(Poznavanje ovlaštenja i dužnosti redara)

Predmet "Poznavanja ovlaštenja i dužnosti redara na skijalištu" obuhvata gradivo koje se odnosi na poznavanje zakona i podzakonskih akata kojima se uređuju javna skijališta, a naročito u vezi sa:

- a) mjerama bezbjednosti i redom na skijalištu;
- b) dužnostima i ovlaštenjima redara na skijalištu;
- c) pravilima reda na skijalištu (ponašanje skijaša i drugih lica na skijalištu);
- d) pravilima korištenja žičara i ski-liftova na skijalištu;
- e) skijaškim nesrećama;
- f) sredstvima prevoza na skijalištu;
- g) sadržajem, izgledom i mjestom postavljanja znakova i signalizacije na skijalištu;
- h) korištenjem i radom skijališta;
- i) prestankom rada žičara i ski-liftova;
- j) opominjanjem i udaljenjem lica sa skijališta;
- k) obezbjeđenjem opasnih mjesta na skijalištu;
- l) osnovama ovlaštenja i odgovornosti turističke inspekcije na skijalištu.

Član 9.

(Način polaganja ispita)

Predmet "Poznavanja ovlaštenja i dužnosti redara na skijalištu" polaže se pismeno i usmeno. Usmeni dio ispita se polaže nakon položenog pismenog dijela.

Član 10.

(Uslovi za polaganje predmeta "Poznavanje skijanja")

Predmet "Poznavanje skijanja" može da polaže kandidat koji je prethodno položio ispit iz predmeta "Poznavanje ovlaštenja i dužnosti redara na skijalištu".

Član 11.

(Sadržaj predmeta "Poznavanje skijanja")

Predmet "Poznavanje skijanja" obuhvata slijedeće gradivo:

- a) poznavanje i rukovanje opremom za skijanje;
- b) poznavanje oblika i tehnika skijanja (alpsko skijanje, snowboarding, telemark);
- c) poznavanje uređenja i pripremanja ski-staza.

Član 12.

(Program polaganja ispita iz predmeta "Poznavanje skijanja")

Predmet "Poznavanje skijanja" obuhvata provjeru spretnosti u skijanju kandidata po kriterijima određenim važećim programom nadležnog sportskog saveza.

Član 13.

(Mjesto polaganja ispita iz predmeta "Poznavanje skijanja")

Polaganje ispita iz predmeta "Poznavanje skijanja" vrši se na skijalištu na području Kantona Sarajevo, na mjestu i u vrijeme koje odredi Komisija.

Član 14.

(Konačan uspjeh kandidata)

- (1) Uspjeh kandidata na stručnom ispitu za svaki predmet i konačan uspjeh ocjenjuje se ocjenom "položio" i "nije položio".
- (2) Konačan uspjeh kandidata na stručnom ispitu utvrđuje Komisija.
- (3) Ako kandidat ne položi predmet "Poznavanje skijanja", smatra se da nije položio ispit.

Član 15.

(Odlaganje polaganja ispita)

- (1) Započeto polaganje stručnog ispita može se odložiti ako je kandidat zbog bolesti ili drugih opravdanih razloga bio spriječen da nastavi polaganje stručnog ispita.
- (2) Komisija donosi odluku o odlaganju stručnog ispita.
- (3) Odlaganje ispita ne može biti duže od tri mjeseca.

Član 16.

(Zapisnik o polaganju ispita)

- (1) O polaganju ispita vodi se zapisnik u koji se unose podaci o sastavu Komisije, kandidatu, sadržini polaganja ispita i dobijenoj ocjeni kandidata.
- (2) Zapisnik potpisuju predsjednik, članovi Komisije i sekretar.

III - STICANJE OVLAŠTENJA ZA OBAVLJANJE
POSLOVA REDARA NA SKIJALIŠTU

Član 17.

(Izdavanje i sadržaj uvjerenja)

- (1) Na osnovu zapisnika o polaganju ispita za redara, kandidatu se izdaje uvjerenje o položenom ispitu.
- (2) Uvjerenje iz stava (1) sadrži:
 - a) naziv Ministarstva koje izdaje uvjerenje;
 - b) propis na osnovu kojeg se izdaje uvjerenje;
 - c) ime, prezime, datum i mjesto rođenja kandidata;
 - d) datum položenog ispita;
 - e) broj, datum i mjesto izdavanja uvjerenja.

Član 18.

(Način izdavanja uvjerenja)

- (1) Uvjerenje o položenom ispitu za redara na skijalištu Ministarstvo izdaje na zahtjev kandidata.
- (2) Izdavanjem uvjerenja o položenom ispitu, kandidat stiče ovlaštenja za obavljanje poslova redara.

IV - IZGLED I NAČIN IZDAVANJA LEGITIMACIJE
REDARA

Član 19.

(Izgled legitimacije)

Obrazac legitimacije je pravougaonog oblika, veličine 71x101 mm, izrađen od PVC materijala sa zaštitnim slojem laminata, čija je prednja strana i poleđina u osnovi svijetlosive boje, prekrivena kombinacijom više nijansi plave boje.

Član 20.

(Sadržaj legitimacije)

- (1) Prednja strana legitimacije sadrži:
 - a) u gornjem dijelu, u sredini, Mali grb Kantona Sarajevo;
 - b) ispod Malog grba, na sredini tekst "KANTON SARAJEVO", a ispod njega upisuje se naziv ministarstva nadležnog za poslove turizma, ispod njega tekst "LEGITIMACIJA", ispod njega tekst: "REDAR NA SKIJALIŠTU", a ispod njega tekst: "Identity card of ski resort attendant".
 - c) ispod teksta iz tačke 2. ovog člana, sa lijeve strane linije za ispisivanje imena i prezimena, ispod nje tekst "Prezime /Last Name", a ispod njega linija za potpis ovlaštenog lica, ispod nje tekst "Ovlašteno lice".
 - d) ispod teksta iz tačke 2. ovog člana, sa desne strane, nalazi se mjesto za fotografiju formata 25x35 mm, preko koje se u donjem lijevom uglu utiskuje pečat Ministarstva.
- (2) Poleđina legitimacije redara sadrži:
 - a) u gornjem dijelu u sredini tekst "OVLAŠTENJA REDARA NA SKIJALIŠTU";
 - b) ispod teksta iz stava (1) odštampan je tekst slijedećeg sadržaja: "Redar je u vršenju svojih dužnosti ovlašten da održava red na skijalištu, u skladu sa članom 51. Zakona o javnim skijalištima ("Službene novine Kantona Sarajevo", broj 54/12), a ispod njega tekst: "Broj legitimacije/Licence number", a u produžetku linija za ispisivanje broja legitimacije;
 - c) na lijevoj strani ispod teksta "Broj legitimacije/Licence number" je linija za ispisivanje datuma izdavanja i tekst "Datum izdavanja";
 - d) na desnoj strani je linija za ispisivanje mjesta izdavanja i tekst: "Mjesto izdavanja".

Član 21.

(Nadležnost za izdavanje legitimacije)

Legitimaciju redara izdaje Ministarstvo, u cilju dokazivanja svojstva ovlaštenog lica za obavljanje poslova redara na skijalištu.

Član 22.

(Sadržaj zahtjeva za izdavanje legitimacije)

Zahtjev za izdavanje legitimacije redara sadrži:

- a) ime, očevo ime i prezime podnosioca zahtjeva;
- b) datum i mjesto rođenja podnosioca zahtjeva;
- c) uvjerenje o položenom ispitu za obavljanje poslova redara na skijalištu.

Član 23.

(Prestanak važenja legitimacije i evidencija)

- (1) Izdata legitimacija prestaje da važi ako legitimacija bude izgubljena ili oštećena tako da se ne može koristiti ili na drugi način postane neupotrebljiva.
- (2) Evidenciju o izdatim, zamijenjenim i nevažećim legitimacijama redara vodi Ministarstvo.

Član 24.
(Obrazac legitimacije)

Legitimacija redara se izdaje na Obrascu 1 - Obrazac legitimacije redara na skijalištu koji je odštampan uz ovaj pravilnik i čini njegov sastavni dio.

Član 25.
(Pravni izvori)

Za pripremu polaganja ispita za redara na skijalištu koriste se sljedeći pravni izvori:

- Zakon o turizmu ("Službene novine Kantona Sarajevo", br. 19/16, 30/16, 31/17 i 34/17 - Ispravka)
- Zakon o javnim skijalištima ("Službene novine Kantona Sarajevo", broj 54/12).

Član 26.
(Gramatička terminologija)

Gramatička terminologija korištena u ovom pravilniku podrazumijeva ravnopravnu upotrebu riječi oba pola.

Član 27.
(Stupanje na snagu)

Ovaj pravilnik stupa na snagu osmog dana od dana objavljivanja u "Službenim novinama Kantona Sarajevo".

Broj 07-02-233/19
14. marta 2019. godine
Sarajevo

Ministar
Mr. sci. **Haris Bašić**, s. r.

Ministarstvo finansija

Na osnovu člana 17. stav (1) Zakona o izvršavanju Budžeta Kantona Sarajevo za 2019. godinu ("Službene novine Kantona Sarajevo", br. 6/19), po zahtjevu JU Narodno pozorište, Ministar finansija donosi sljedeću

ODLUKU

O PRERASPODJELI SREDSTAVA U BUDŽETU KANTONA SARAJEVO ZA 2019. GODINU ZA BUDŽETSKOG KORISNIKA JU NARODNO POZORIŠTE

- Odobrava se preraspodjela sredstava u Budžetu Kantona Sarajevo za 2019. godinu u iznosu 20.000,00 KM u razdjelu 22020001 JU Narodno pozorište i to:

Raz	Gla- va	Potr. jed	Ekon. kod	Sub- ana- litika	Funk- cija	OPIS	Iznos
						sa ekonomskih kodova (vlastita sredstva)	
22	02	0001	22020001	613100	082F	Putni troškovi	15,000
22	02	0001	22020001	613200	082F	Izdaci za energiju	5,000
						na ekonomske kodove (vlastita sredstva)	
22	02	0001	22020001	613600	082F	Unajmljivanje imovine, opreme i nematerijalne imovine	7,500
22	02	0001	22020001	613800	082F	Izdaci osiguranja, bankarskih usluga i usluga platnog prometa	2,500
22	02	0001	22020001	613900	082F	Ugovorene i druge posebne usluge	10,000

- Ova odluka stupa na snagu danom donošenja, a objavit će se u "Službenim novinama Kantona Sarajevo".

Broj 08-14-5764/19
30. aprila 2019. godine
Sarajevo

Ministar
Amel Kovačević, s. r.

OPĆINA HADŽIĆI

Općinsko vijeće

Na osnovu čl. 32 stav (3) Zakona o prostornom uređenju ("Službene novine Kantona Sarajevo", br. 24/17 i 1/18) i čl. 14. i 24. Statuta Općine Hadžići ("Službene novine Kantona Sarajevo" br. 15/09, 17/12, 10/13, 14/13 - ispravka i 11/18), Općinsko vijeće Hadžići, na 26. sjednici održanoj dana 30.04.2019. godine, donosi

ODLUKU

O PRISTUPANJU IZRADI REGULACIONOG PLANA STAMBENO NASELJE "UŠIVAK I" - HADŽIĆI

Vrsta plana

Član 1.

Pristupa se izradi Regulacionog plana Stambeno naselje "Ušivak I" Hadžići (u daljem tekstu - Plan).

Granice područja za koje se Plan radi

Član 2.

Granica obuhvata polazi od tromede parcela k.č. 1143/2, 1144 i 1146, zatim produžava na sjever, te istok idući međama parcela k.č. 1143/2, 1143/1, 1152, 1154, 1141 (obuhvata ih), te dolazi do tromede parcela k.č. 1141, 1142 i 1442. Granica potom nastavlja na jug, te zapad idući međama parcela k.č. 1141, 1142, 1143/1, 1143/2 (obuhvata ih) i dolazi do mjesta odakle je opis granice i počeo. Sve gore navedene parcele se nalaze u K.O. Donji Hadžići, Općina Hadžići. Površina obuhvata iznosi P=2,45ha.

Član 3.

Izgradnja na području planiranja u granicama opisanim u članu 2. se vrši na osnovu Plana.

Član 4.

U obuhvatu ovog Plana defmisano je kao građevinsko zemljište (Urbano područje Hadžići).

Smjernice za izradu Plana

Član 5.

Cilj izrade provedbenog planskog dokumenta je da se predmetno područje urbanizira na kvalitetan način, predloži optimalna organizacija prostora sa kompleksom objekata apartmanskog tipa stanovanja i isto opremi kvalitetnom saobraćajnom, komunalnom i društvenom infrastrukturom, da se preispitaju prostorne mogućnosti područja sa aspekta konfiguracije terena, geologije i uslova stabilnosti terena, a poštujući uvjete zaštite okoliša u skladu sa odredbama Zakona o prostornom uređenju ("Službene novine Kantona Sarajevo", br. 7/05 i Zakona o zaštiti okoliša "Službene novine Federacije BiH", br. 33/03 i 38/09).

Prema Prostornom planu Kantona Sarajevo za period 2003.-2023. god. ("Službene novine Kantona Sarajevo", br. 26/06, 4/11 i 22/17) predmetno područje se nalazi u urbanom području Općine Hadžići u granicama građevinskog zemljišta.

Izvršiti snimanje i digitalizaciju geodetskih podloga u razmjeri 1:1000;

Obezbediti Elaborat o inženjersko-geološkim i geotehničkim karakteristikama terena od strane privrednog društva koje je registrovano za ovu djelatnost kod mjerodavnog suda, a koje ima rješenje Federalnog ministarstva energije, rudarstva i